




Scripture
Union 读经会
SEMENANJUNG MALAYSIA

TANYA-TANYA FIRMAN



DITERBITKAN OLEH

Scripture Union Semenanjung Malaysia

386, Jalan 5/59, 46000, Petaling Jaya,
Selangor, Malaysia.

Scripture Union Semenanjung Malaysia adalah sebuah organisasi berdaftar yang komited untuk memberi impak kepada 1 juta pelajar dengan Firman Allah. Kami melayani komuniti dan gereja melalui Pelayanan Kanak-kanak, Belia, Penjalinan dengan Firman dan juga Pelayanan Sukan.

Telefon: +603-77829592
Emel: info@su.org.my
Laman web: www.su.org.my

Hak cipta © Scripture Union Semenanjung Malaysia.

Hak cipta terpelihara. Tiada bahagian dalam buku ini boleh dihasilkan dalam apa jua bentuk atau dengan apa-apa cara elektronik atau mekanikal termasuk penyimpanan maklumat dan sistem pengambilan tanpa kebenaran bertulis daripada penerbit.

Petikan ayat-ayat berasal daripada Alkitab Versi Borneo 2019.
Hak cipta terpelihara © Borneo Sabda Limited
Digunakan dengan kebenaran. Semua hak terpelihara di seluruh dunia.

Klip audio dan video dalam sumber ini adalah daripada Faith Comes by Hearing dan Projek Lumo. Digunakan dengan kebenaran.



**Faith Comes
By Hearing®**



LUMO
PROJECT

Terima kasih banyak-banyak kepada Wendy Strachan dan Annette Osborne untuk soalan-soalan dalam Tanya-Tanya Firman #3.

#1	KELAHIRAN YESUS	7
#2	ORANG SAMARIA YANG MURAH HATI	9
#3	DOMBA YANG HILANG	11
#4	AYAH DAN ANAK-ANAKNYA	13
#5	PENGAMPUNAN DOSA-DOSA	16
#6	ANGIN RIBUT	18
#7	LEGION	20
#8	IBARAT TENTANG MAJLIS JAMUAN BESAR	22
#9	ORANG KAYA YANG BODOH	24
#10	MUTIARA YANG PALING TINGGI NILAINYA	25
#11	IBARAT TENTANG SEORANG PENYEMAI"	26
#12	YESUS MEMBERI MAKAN KEPADA 5000 ORANG	28
#13	PEREMPUAN YANG BERZINA	30
#14	YESUS MENYEMBUHKAN SEORANG LELAKI YANG BUTA SEJAK LAHIR	32
#15	REAKSI TERHADAP PENYEMBUHAN ORANG BUTA	34
#16	AKU GEMBALA YANG BAIK	37
#17	KEMATIAN LAZARUS	39
#18	AKULAH KEBANGKITAN DAN HIDUP	41
#19	YESUS MENANGIS	43
#20	YESUS MEMBANGKITKAN LAZARUS	44
#21	MARIA MENGURAPI YESUS DI BETANIA	46
#22	YESUS MEMBASUH KAKI MURID-MURID-NYA	48
#23	AKULAH JALAN, KEBENARAN DAN HIDUP	50
#24	AKULAH POKOK ANGGUR YANG BENAR	52
#25	BERDOA ATAU TIDUR	54
#26	PENGKHIANATAN	56
#27	PENYALIBAN	58
#28	MAKAM YANG KOSONG	60
#29	DIA BANGKIT	62
#30	YESUS DAN TOMAS	64


Pembentukan Iman Melalui Perbualan Tentang Allah

Perbualan adalah penting. Melalui perbualanlah kita saling memahami dan menghargai satu sama lain dengan lebih baik. Kita dapat berkongsi idea, pemikiran, pendapat, kisah dan perjalanan hidup kita. Dalam konteks keluarga, perbualan tentang perkara rohani amat diperlukan antara ibu bapa (terutama para bapa) dengan anak-anak kerana ia amat diperlukan untuk pembentukan iman. Kami berpendapat betapa pentingnya diadakan lebih banyak perbualan antara anak-anak dengan ibu bapa mengenai hal-hal rohani.

Scripture Union Semenanjung Malaysia telah menghasilkan Tanya-Tanya Firman untuk membantu ibu bapa mengadakan perbualan yang bermakna tentang Allah dengan anak-anak mereka berasaskan petikan-petikan Firman Allah. Dalam sesi perbualan sedemikian, rasa ingin tahu si anak diharap terangsang dan jiwa mereka seterusnya tertanya-tanya. Demikianlah sumber ini berjudul Tanya-Tanya Firman. Buku sumber ini juga akan membantu kanak-kanak yang lain untuk berjaln dengan Firman Allah dengan bantuan orang dewasa.

PENTINGLAH DIPERHATIKAN BAHAWA BUKU SUMBER INI BERTUJUAN MEMBANTU DAN MEMUDAHCARAKAN SESI TANYA-TANYA FIRMAN.

- Sumber ini TIDAK dimaksudkan untuk Pengkajian Alkitab.
- Sumber ini TIDAK dimaksudkan untuk mengajar atau sebagai pelajaran Sekolah Minggu yang biasa.
- Bagaimanapun, Alkitab tetap menjadi teks utama dalam Tanya-Tanya Firman. Memang bermanfaat untuk membaca teks bersama-sama.
- Matlamatnya bukanlah sekadar untuk mendapatkan jawapan yang betul, tetapi apa yang lebih penting ialah si anak memberikan respons yang jujur terhadap teks itu.
- Soalan-soalan bertujuan menjadi pemangkin untuk membantu si anak bertanya-tanya dan menemukan jawapan. Anda tidak perlu menggunakan semua soalan. Saring dan pilihlah apa yang sesuai untuk konteks anda.
- Beberapa soalan adalah lebih tersurat; yang lain adalah untuk merangsangkan rasa ingin tahu kita tentang teks dan cerita. Ibu bapa harus melawan keinginan untuk memberikan jawapan. Anda mungkin juga tidak mempunyai jawapannya. Oleh itu, kita belajar mempelajari Alkitab bersama-sama dengan si anak.
- Tidak seperti pengkajian Alkitab yang biasa, yang tertumpu semata-mata pada perbincangan teks, tidak apa-apa dalam Tanya-Tanya Firman untuk mempunyai perbincangan “sampingan” yang panjang lebar selagi ibu bapa dapat memperoleh ‘masa makan ajar’ bersama-sama dengan si anak tentang Allah, Firman-Nya dan kehidupan.
- Berkongsi perjalanan dan kisah anda sendiri adalah bagus tetapi galakkanlah si anak untuk berkongsi kisah, fikiran dan perspektifnya sendiri.
- Matlamat utama adalah untuk membantu si anak berinteraksi dengan Alkitab dan menemukan Alkitab itu sebenarnya bukan sahaja menarik tetapi juga relevan, dan dalam proses itu, lebih lagi mengenal Allah.
- Oleh itu, kami cadangkan persekitaran dalam konteks keluarga, eloklah dalam suasana santai untuk Tanya-Tanya Firman ini. Anda mungkin boleh melakukannya di meja makan selepas makan, atau duduk di sofa bersama-sama atau duduk di lantai sahaja.
- Kami galakkan anda mengakhiri Tanya-Tanya Firman ini dengan doa, terutamanya perkara-perkara yang berkenaan dengan apa yang telah dikongsikan oleh si anak dengan anda.




**Kami berdoa agar anda
mempunyai masa tertanya-
tanya yang sangat seronok
dengan anak anda atau
kanak-kanak yang lain.**

#1 KELAHIRAN YESUS

TONTON VIDEO <https://tinyurl.com/KelahiranYesusTTF>

DENGARKAN PEMBACAAN <https://tinyurl.com/KelahiranYesusAud>



Baca Lukas 2:8-20 Alkitab Versi Borneo - AVB

⁸Di daerah itu ada beberapa orang gembala yang bermalam di padang kerana menjaga domba mereka. ⁹Tiba-tiba malaikat Tuhan muncul di hadapan mereka dan kemuliaan Tuhan menerangi mereka, lalu mereka ketakutan.

¹⁰Tetapi malaikat itu berkata kepada mereka, “Jangan takut! Aku membawa kepadamu berita baik yang akan memberikan sukacita besar kepada seluruh umat. ¹¹Pada malam ini di kota Daud telah lahir seorang Penyelamat bagimu, iaitu Kristus, Tuhan.

¹²Ini tandanya bagimu: Kamu akan menjumpai seorang anak yang dibedung dan dibaringkan di dalam sebuah palung.” ¹³Tiba-tiba malaikat itu disertai oleh satu angkatan syurga yang besar memuji-muji Allah: ¹⁴“Kemuliaan bagi Allah di tempat yang maha tinggi dan damai sejahtera di bumi bagi orang yang berkenan pada hati-Nya.” ¹⁵Setelah malaikat-malaikat itu meninggalkan mereka untuk kembali ke syurga, gembala-gembala itu berkata sesama sendiri, “Marilah kita pergi ke Betlehem untuk melihat kejadian yang telah berlaku itu seperti yang diberitahu Tuhan kepada kita.”

¹⁶Mereka pergi dengan segera lalu menjumpai Maria dan Yusuf serta bayi itu yang sedang terbaring di dalam palung.

¹⁷Setelah melihat bayi itu, mereka pun memberitahu segala yang telah dikatakan kepada mereka tentang anak itu. ¹⁸Semua yang mendengar berasa kagum tentang apa yang dikatakan oleh gembala-gembala itu kepada mereka; ¹⁹tetapi Maria menyimpan segala perkara ini dalam hatinya dan merenunginya. ²⁰Kemudian gembala-gembala itu pulang sambil memuji-muji Allah atas segala yang didengar dan dilihat mereka. Segalanya seperti yang dikatakan kepada mereka.

SAYA TERTANYA-TANYA

- Mengapa para gembala perlu menjaga kawanan domba pada waktu malam.
- Bagaimana rupanya malaikat.
- Apa yang difikirkan oleh para gembala tentang mesej yang disampaikan oleh malaikat itu.
- Bagaimana rasanya mendengar seangkatan malaikat memuji-muji Allah.
- Mengapa para gembala itu bergegas mencari Maria, Yusuf dan bayi itu.
- Siapa bayi ini.
- Mengapa para gembala memuliakan dan memuji Allah selepas melihat bayi itu.

#2 ORANG SAMARIA YANG MURAH HATI

TONTON VIDEO <https://tinyurl.com/OrangSamariaTTF>

DENGARKAN PEMBACAAN <https://tinyurl.com/OrangSamariaAud>

Baca Lukas 10:29-37 Alkitab Versi Borneo – AVB

²⁹Tetapi dia hendak membela dirinya lalu dia berkata kepada Yesus, “Siapakah sesama manusia itu?” ³⁰Yesus menjawab, “ Ada seorang dalam perjalanan dari Yerusalem ke Yerikho. Dia diserang oleh penyamun yang merompaknya dan membelasahnya sehingga setengah mati.

³¹Kebetulannya, seorang imam melalui jalan itu. Apabila dia melihat si malang itu, dia menyeberangi jalan dan meneruskan perjalanannya. ³²Begitu juga seorang suku bangsa Lewi melalui tempat itu dan melihat si malang itu. Dia juga menyeberangi jalan dan meneruskan perjalanannya.

³³Akan tetapi, seorang bangsa Samaria juga lalu di tempat itu dalam perjalanannya. Dia melihat si malang itu dan hatinya dipenuhi dengan belas kasihan. ³⁴Dia menghampiri si malang itu lalu membersihkan luka-lukanya dengan air anggur dan minyak serta membalut luka itu.

Kemudian, dia menaikkan si malang itu ke atas keldai tunggangannya dan membawanya ke rumah tumpangan untuk terus merawatinya di situ. ³⁵Pada keesokan harinya orang Samaria itu memberikan dua keping wang dinar kepada tuan rumah tumpangan untuk perbelanjaan si malang itu sambil berkata, ‘Jagalah dia dan sekiranya wang ini tidak cukup untuknya, aku akan membayarnya apabila aku datang kembali.’”

³⁶Yesus berkata, “ Antara tiga orang itu, siapakah pada pandangan kamu menjadi sesama manusia kepada orang yang dirompak oleh penyamun?” ³⁷Ahli Taurat itu menjawab, “Orang yang menunjukkan belas kasihan kepadanya.” Yesus berkata, “Pergi dan berbuatlah sedemikian.”



SAYA TERTANYA-TANYA

- Mengapa lelaki itu dalam perjalanan dari Yerusalem ke Yerikho.
- Berapa jauh dan berapa lama perjalanan itu.
- Bagaimana perasaan lelaki itu ketika dia diserang oleh perompak-perompak itu.
- Mengapa imam dan orang Lewi itu sengaja menyeberangi jalan dan meneruskan perjalanan mereka.
- Mengapa orang Samaria itu mengambil keputusan untuk menghulurkan bantuan.
- Siapa yang menjadi sesama manusia atau jiran yang baik.
- Saya merupakan sesama manusia atau jiran yang bagaimana.

SOALAN APLIKASI TAMBAHAN

- Bincangkan bagaimana kita boleh menjadi sesama manusia atau jiran yang baik sepanjang masa seperti sekarang ini di negara kita.



#3 DOMBA YANG HILANG

TONTON VIDEO <https://tinyurl.com/DombaHilangTTF>

DENGARKAN PEMBACAAN <https://tinyurl.com/DombaHilangAud>

Baca Lukas 15:3-7 Alkitab Versi Borneo – AVB

³Yesus pun mengatakan ibarat ini kepada mereka.

⁴“Jika seorang antara kamu mempunyai seratus ekor domba lalu kehilangan seekor, apakah yang akan dilakukannya? Dia akan meninggalkan sembilan puluh sembilan ekor domba di padang lalu pergi mencari domba yang hilang itu sehingga ditemukannya.

⁵Setelah dia menemukannya, dia memikul domba itu di atas bahunya.

⁶Setibanya di rumah, dia memanggil sahabat-sahabat dan jiran tetangganya lalu berkata, ‘Bergembiralah dengan aku kerana aku telah menemukan domba aku yang hilang itu.’

⁷Aku berkata kepadamu bahawa begitu jugalah kegembiraan di syurga kerana seorang yang berdosa bertaubat lebih daripada kegembiraan ke atas sembilan puluh sembilan orang yang benar yang tidak perlu bertaubat.”



SAYA TERTANYA-TANYA

- Sama ada domba itu mempunyai nama.
- Mengapa domba itu merayau jauh.
- Mengapa gembala itu pergi mencari domba yang seekor itu.
- Apa yang berlaku kepada 99 ekor domba yang lain.
- Bagaimana perasaan domba itu sewaktu tersesat.
- Bagaimana perasaan domba itu ketika ditemukan.
- Mengapa Yesus menceritakan kisah ini.
- Anda berasa seperti siapa dalam kisah ini.



#4 AYAH DAN ANAK-ANAKNYA

TONTON VIDEO <https://tinyurl.com/AyahAnakAnaknyaTTF>

DENGARKAN PEMBACAAN <https://tinyurl.com/AyahAnakAnaknyaAud>

Baca Lukas 15:11-32 Alkitab Versi Borneo – AVB

¹¹Yesus berkata seterusnya: " Ada seorang yang mempunyai dua orang anak lelaki.¹²Anak bongsu berkata kepada bapanya, 'Ayah, berilah aku sekarang bahagian harta yang akan menjadi pusakaku.' Lalu bapa itu membahagikan hartanya kepada kedua-dua anaknya itu.

¹³Tidak lama kemudian, yang bongsu itu menjual hartanya dan merantau ke negeri yang jauh. Di situ dia memboroskan wangnya dengan hidup berfoya-foya.¹⁴Setelah dia menghabiskan kesemua wangnya, suatu kebuluran yang teruk berlaku di negeri itu dan dia dalam keadaan serba kekurangan.

¹⁵Dia pergi bekerja dengan seorang penduduk negeri itu dan disuruh menjaga babi di ladangnya.¹⁶Dia ingin mengisi perutnya dengan sekam kacang yang dimakan oleh babi tetapi tiada seorang pun yang memberikan apa-apa kepadanya. ¹⁷Akhirnya, dia sedar dan berkata, 'Semua orang gaji bapaku dapat makan sehingga kenyang, tetapi aku ini hampir mati kelaparan!¹⁸Aku hendak kembali kepada bapaku, dan aku akan berkata kepadanya: Ayah, aku telah berbuat dosa kepada syurga dan kepada ayah. ¹⁹Aku tidak layak disebut sebagai anak ayah. Jadikanlah aku ini sebagai salah seorang gaji ayah.'

²⁰Dia pun kembali kepada bapanya. Semasa dia masih jauh lagi, bapanya nampak dia. Hatinya penuh dengan belas kasihan dan dia berlari menemuinya. Bapanya memeluk dan menciumnya.



²¹Anak itu berkata kepada bapanya, 'Ayah, aku telah berbuat dosa kepada syurga dan kepada ayah. Aku tidak layak disebut anak ayah.' ²²Bapa itu menyuruh hamba-hambanya, 'Segeralah ambil pakaian yang terbaik dan pakaikanlah kepada anakku. Sarungkan sebetuk cincin pada jarinya dan pakaikan kasut pada kakinya.

²³Pilihlah dan sembelihlah anak lembu yang tambun, dan marilah kita mengadakan jamuan dan bersuka ria; ²⁴kerana anakku ini telah mati dan hidup kembali; dia telah hilang dan ditemukan kembali.' Lalu mereka mula bersuka ria. ²⁵Pada masa itu anak sulung bekerja di ladang. Apabila dia pulang ke rumah, dia terdengar bunyi muzik dan orang menari-nari.

²⁶Dia memanggil seorang hamba lalu bertanya, 'Apakah yang sedang berlaku ini?' ²⁷Hamba itu menjawab, 'Adik tuan telah pulang dan bapa tuan telah menyembelih anak lembu yang tambun kerana adik tuan pulang dengan selamatnya.' ²⁸Anak sulung itu sangat marah sehingga dia tidak mahu masuk ke dalam rumah. Ayahnya keluar lalu memujuk dia.

²⁹Anak sulung itu berkata, 'Tengoklah, bertahun-tahun aku bekerja untuk ayah. Aku tidak pernah melanggar perintah ayah. Tetapi ayah tidak pernah memberikan seekor anak kambing pun kepada aku supaya aku dapat bersuka ria dengan sahabat-sahabatku.

³⁰Namun sepulangnya anak ayah ini yang telah memboroskan harta ayah dengan perempuan-perempuan sundal, ayah menyembelih anak lembu yang tambun untuknya!'

³¹Bapa itu berkata kepadanya, 'Anakku, engkau ini sentiasa bersama ayah, dan segala milik ayah ialah milikmu. ³²Kita patut bersuka ria kerana adikmu ini telah mati dan hidup kembali; dia telah sesat dan ditemukan kembali.'"

SAYA TERTANYA-TANYA

- Mengapa anak bongsu itu meminta bahagian harta pusaknya.
- Mengapa anak bongsu itu menghabiskan semua wangnya.
- Bagaimana perasaannya hidup bersama dengan babi-babi itu.
- Apa yang membuat dia terfikir akan ayahnya.
- Apa perasaan ayah itu apabila dia melihat anak bongsunya dari jauh.
- Mengapa abangnya berasa marah.
- Mengapa si ayah itu mengadakan jamuan dan bersuka ria apabila anaknya yang hilang itu kembali.
- Saya sama seperti siapa dalam cerita ini.



#5 PENGAMPUNAN DOSA-DOSA

TONTON VIDEO <https://tinyurl.com/PengampunanTTF>

DENGARKAN PEMBACAAN <https://tinyurl.com/PengampunanAud>

Baca Markus 2:1-12 Alkitab Versi Borneo – AVB

¹Beberapa hari kemudian, Yesus pulang ke Kapernaum dan tersebarlah khabar itu. ²Ramailah orang datang berhimpun di rumah tempat Dia tinggal itu, sehingga penuh sesak sampai ke pintu. Yesus pun menyampaikan firman kepada mereka. ³Datanglah empat orang mengusung seorang yang lumpuh.

⁴Mereka tidak dapat membawanya kepada Yesus kerana orang ramai itu. Oleh itu, mereka membuka bumbung rumah betul-betul di atas tempat Yesus berada lalu menurunkan orang lumpuh yang terbaring di atas tikar. ⁵Ketika Yesus melihat iman mereka, Dia berkata kepada orang lumpuh itu, “Anak-Ku, dosamu telah diampunkan.” ⁶Ahli-ahli Taurat yang duduk di situ berkata dalam hati, ⁷“Lancangnya orang ini mengkufuri Allah! Tiada siapa boleh mengampunkan dosa kecuali Allah!”

⁸Tetapi Yesus segera mengetahui dalam roh-Nya bahawa mereka berfikir demikian lalu berkata, “Mengapa kamu berfikir begitu dalam hatimu? ⁹Manakah yang lebih mudah dikatakan kepada orang lumpuh itu: ‘Dosamu telah diampunkan,’ atau, ‘Bangun, angkat tikarmu dan berjalan’? ¹⁰Tetapi supaya kamu tahu bahawa di bumi ini Anak Manusia berkuasa mengampunkan dosa...” Dia berkata kepada orang lumpuh itu,

¹¹“Aku berkata kepadamu, bangun, angkat tikarmu, dan pulanglah.” ¹²Di hadapan mata mereka semua, orang lumpuh itu pun bangun, mengangkat tikarnya lalu segera berjalan ke luar. Semua orang di situ tercengang lalu memuji Allah. Mereka berkata, “Belum pernah kami lihat kejadian begini!”



SAYA TERTANYA-TANYA

- Apa suasana di tempat tinggal Yesus.
- Siapa empat orang lelaki yang mengusung orang lumpuh itu.
- Apa reaksi orang ramai apabila mereka melihat orang lumpuh itu diturunkan.
- Apa reaksi Yesus.
- Mengapa Yesus memberitahu lelaki itu, “Dosamu telah diampunkan”.
- Apa reaksi orang ramai (termasuk ahli-ahli Taurat) terhadap apa yang dikatakan oleh Yesus.
- Yang manakah lebih mudah dikatakan, “Dosamu telah diampunkan atau bangun, angkat tikarmu dan berjalan”. Mengapa?
- Apa tujuan Yesus menyembuhkan orang lumpuh itu.



#6 ANGIN RIBUT

TONTON VIDEO <https://tinyurl.com/AnginRibutTTF>

DENGARKAN PEMBACAAN <https://tinyurl.com/AnginRibutAud>

Baca Markus 4:35-41 Alkitab Versi Borneo – AVB



³⁵Pada petang itu juga, Yesus berkata kepada murid-murid-Nya, “Marilah kita pergi ke seberang sana.”

³⁶Ketika itu Yesus di dalam perahu. Para murid-Nya meninggalkan orang ramai itu di pantai lalu belayar bersama-Nya. Ada beberapa perahu lain yang belayar bersama-sama.

³⁷Lalu angin ribut bertiup kencang dan ombak melanda perahu sehingga hampir dipenuhi air. ³⁸Ketika itu Yesus sedang tidur di buritan perahu, kepala-Nya beralaskan bantal. Para murid-Nya membangunkan Dia lalu berkata, “Guru, tidakkah Engkau peduli? Kita hampir karam!”

³⁹Yesus bangun lalu menegur angin dan berkata kepada ombak, “Diam! Tenanglah!” Angin pun reda dan laut menjadi tenang.

⁴⁰Kemudian Yesus berkata kepada murid-murid-Nya, “Mengapa kamu begitu takut? Mengapa kamu masih tidak percaya?”

⁴¹Mereka berasa gerun lalu berkata sesama sendiri, “Siapakah Dia ini? Angin dan ombak pun mengikut perintah-Nya!”

SAYA TERTANYA-TANYA

- Apa jenis perahu itu.
- Berapa orang di dalam perahu itu.
- Bagaimana rasanya terperangkap dalam ribut seperti itu.
- Mengapa Yesus sedang tidur.
- Mengapa murid-murid itu membangunkan Yesus.
- Bagaimana mungkin ribut reda dan angin berhenti bertiup hanya dengan perintah Yesus.
- Bagaimana perasaan murid-murid Yesus sepanjang kejadian itu.

SOALAN APLIKASI TAMBAHAN

- Bincangkan apakah jenis ribut yang sedang dihadapi dunia pada hari ini. Di manakah Yesus? Apakah yang boleh Yesus lakukan?



#7 LEGION

TONTON VIDEO <https://tinyurl.com/LegionTTF>

DENGARKAN PEMBACAAN <https://tinyurl.com/LegionAud>

Baca Markus 5:1-20 Alkitab Versi Borneo – AVB

¹Lalu sampailah mereka di seberang laut, di daerah Gerasa. ²Sebaik-baik Yesus turun dari perahu, seorang lelaki yang kerasukan roh jahat keluar dari perkuburan lalu menemui-Nya. ³Orang itu tinggal di gua kubur. Tiada siapa terdaya mengikatnya lagi, meskipun dengan rantai.

⁴Berkali-kali dia dirantai dan dibelenggu, tetapi dapat diputuskannya rantai itu dan dipatahkannya belenggu itu. Tiada seorang pun dapat menguasainya.


⁵Siang malam dia merayau di perkuburan dan di bukit, sambil menjerit-jerit dan mencederakan badannya dengan batu.

⁶Dari jauh dia melihat Yesus lalu lari mendekati-Nya dan sujud di hadapan-Nya. ⁷Orang itu berseru dengan suara keras, “Ya Yesus, Anak Allah Yang Maha Tinggi, apa urusan-Mu dengan aku? Demi Allah, jangan seksa aku!”

⁸Kerana sebelumnya Yesus berkata kepadanya, “Roh jahat, keluarlah kamu daripada orang ini!” ⁹Kemudian Yesus bertanya kepadanya, “Siapakah namamu?” Orang itu menjawab, “Legion, kerana kami ini ramai sekali.”

¹⁰Dia memohon sungguh-sungguh kepada Yesus supaya tidak menghalau mereka keluar dari kawasan itu.

¹¹Berdekatan tempat itu ada kawanan babi yang sedang mencari makan di lereng bukit. ¹²Roh-roh iblis itu memohon kepada Yesus, “Suruhlah kami pindah kepada babi itu, biarlah kami masuk ke dalam tubuh babi itu.”



¹³Yesus bersetuju, lalu roh-roh jahat itu keluar dan masuk ke dalam tubuh kawanan babi itu. Kesemua babi itu, kira-kira dua ribu ekor, terjun dari tepi cenuram ke dalam laut lalu mati lemas.¹⁴Penjaga-penjaga babi itu lari lalu menyebarkan berita itu di bandar dan di desa. Para penduduk pun keluar hendak melihat apa yang telah terjadi.

¹⁵Mereka menghampiri Yesus lalu melihat orang yang tadinya dirasuk legion daripada roh iblis itu, kini duduk diam, sudah berpakaian dan ternyata siuman. Mereka semua pun ketakutan. ¹⁶Semua yang telah menyaksikan kejadian itu menceritakan segala-galanya tentang orang yang kerasukan roh iblis dan kawanan babi itu.

¹⁷Oleh itu, mereka meminta Yesus meninggalkan daerah itu. ¹⁸Ketika Yesus menaiki perahu, orang yang tadinya dirasuk roh iblis itu memohon kepadanya, supaya dia dibenarkan menyertai-Nya.

¹⁹Tetapi Yesus tidak membenarkannya, sebaliknya berkata, “Pulanglah kepada keluargamu, kepada orang sekampungmu. Beritahu mereka betapa besarnya pertolongan Tuhan bagimu dan bagaimana Dia telah berbelas kasihan kepada kamu.”

²⁰Orang itu pun mula menjelajahi daerah sepuluh kota dan menceritakan segala yang telah dilakukan oleh Yesus untuknya. Mereka semua kehairanan.

SAYA TERTANYA-TANYA

- Apa keadaannya hidup di perkuburan (di dalam gua kubur).
- Apa rasanya mempunyai kekuatan sedemikian.
- Mengapa lelaki itu berlari mendekati Yesus dan sujud di hadapan-Nya.
- Bagaimana dia tahu siapa Yesus.
- Mengapa legion itu meminta kebenaran untuk masuk ke dalam tubuh kawanan babi itu.
- Mengapa penjaga-penjaga babi dan penduduk di daerah itu bereaksi sedemikian.
- Apa yang terlintas dalam fikiran lelaki yang dirasuk iblis itu sepanjang kejadian itu.
- Berapa banyak yang telah Tuhan lakukan untuk lelaki itu.

#8 IBARAT TENTANG MAJLIS JAMUAN BESAR

TONTON VIDEO <https://tinyurl.com/lbaratJamuanTTF>

DENGARKAN PEMBACAAN <https://tinyurl.com/lbaratJamuanAud>


Baca Lukas 14:15-24 Alkitab Versi Borneo – AVB

¹⁵Salah seorang jemputan itu mendengar kata-kata Yesus lalu berkata, “Diberkatilah orang yang akan dijamu dalam kerajaan Allah.” ¹⁶Yesus berkata kepadanya: “Ada seorang yang mengadakan jamuan besar dan dia menjemput ramai orang.

¹⁷Apabila tiba masanya, dia menyuruh hambanya pergi memberitahu para jemputannya, 'Silakanlah, kerana semuanya siap sedia.' ¹⁸Tetapi masing-masing mula berdalih. Yang pertama berkata, 'Aku telah membeli sebuah ladang dan aku harus pergi ke sana. Aku minta maaf.'

¹⁹Seorang yang lain berkata, 'Aku telah membeli lima pasang lembu dan harus pergi mencuba lembu-lembu itu. Aku minta maaf.' ²⁰Seorang yang lain lagi berkata, 'Aku baru berkahwin. Oleh itu, aku tidak dapat datang.'

²¹Hamba itu pulang dan memberitahu tuannya hal ini. Tuan rumah itu sangat marah dan menyuruh hambanya, 'Pergilah dengan segera ke jalan-jalan dan lorong-lorong kota dan bawalah orang miskin, orang kudung, orang buta dan orang tempang ke mari.'



²²Hamba itu berkata, 'Tuan, apa yang tuan suruh telah dilakukan tetapi masih ada tempat lagi.' ²³Tuan rumah berkata kepada hambanya, 'Pergilah ke jalan-jalan raya dan lorong-lorong di luar kota serta suruh orang datang supaya rumahku penuh.

²⁴Aku berkata kepadamu bahawa tiada seorang pun antara mereka yang telah dijemput itu, akan menikmati jamuanku ini.' “

SAYA TERTANYA-TANYA

- Apa yang diharapkan oleh orang ramai dalam jamuan besar itu.
- Apa yang diperlukan untuk mengadakan sebuah jamuan besar.
- Bagaimana perasaan saya sekiranya semua tetamu jemputan saya tidak mahu datang.
- Mengapa para jemputan itu tidak mahu datang.
- Apa alasan lain yang diberikan oleh para jemputan itu.
- Bagaimana perasaan orang miskin, lumpuh, buta dan tempang sewaktu mereka dijemput.
- Sama ada saya akan dijemput (atau tidak).



#9 ORANG KAYA YANG BODOH

TONTON VIDEO <https://tinyurl.com/OrangKayaTTF>


DENGARKAN PEMBACAAN <https://tinyurl.com/OrangKayaAud>

Baca Lukas 12:16-21 Alkitab Versi Borneo – AVB

¹⁶Lalu Dia pun menceritakan kepada mereka satu ibarat: “Seorang kaya mempunyai tanah yang mengeluarkan hasil yang banyak. ¹⁷Dia berfikir dalam hatinya, 'Apakah yang harus aku buat? Tiada lagi tempat untuk menyimpan hasil tanahku.' ¹⁸Dia berkata, 'Baiklah aku berbuat begini. Aku akan meruntuhkan gudang-gudangku dan membina yang lebih besar. Di situlah aku akan menyimpan segala gandum dan harta bendaku.

¹⁹Aku akan berkata kepada diriku, engkau mempunyai harta yang banyak untuk keperluanmu selama bertahun-tahun. Nikmatilah hidup. Makan minum dan bersuka rialah.'

²⁰Tetapi Allah berfirman kepadanya, 'Engkau bodoh! Pada malam ini juga, jiwamu akan dituntut kembali daripadamu. Lalu harta benda yang telah kaukumpulkan itu akan menjadi hak siapa?' ²¹“Demikianlah halnya orang yang menyimpan harta benda untuk dirinya tetapi tidak kaya pada pandangan Allah.”



SAYA TERTANYA-TANYA

- Bagaimana rasanya menjadi kaya.
- Sama ada menjadi seorang yang kaya itu salah.
- Jenis tanaman apa yang ditanam oleh orang kaya itu.
- Sebesar mana gudangnya.
- Mengapa Allah memanggilnya orang bodoh.
- Apa maksudnya kaya pada pandangan Allah.
- Mengapa Yesus menceritakan ibarat ini.

#10 MUTIARA YANG PALING TINGGI NILAINYA


TONTON VIDEO <https://tinyurl.com/MutiaraTTF>

DENGARKAN PEMBACAAN <https://tinyurl.com/MutiaraAud>

Baca Matus 13:44-46 Alkitab versi Borneo – AVB

⁴⁴“Kerajaan syurga ibarat harta yang tersembunyi di dalam sebidang tanah. Seseorang telah menjumpainya lalu menyembunyikannya semula. Setelah itu, dengan penuh sukacita dia menjual segala yang dimilikinya lalu membeli tanah itu.”

⁴⁵“Kerajaan syurga juga umpama seorang saudagar yang mencari mutiara yang paling tinggi nilainya. ⁴⁶Apabila dia menjumpai mutiara yang paling bernilai, dia pun menjual semua yang dimilikinya lalu membeli mutiara itu.”



SAYA TERTANYA-TANYA

- Bagaimana kerajaan syurga itu.
- Apa harta yang dihargai orang.
- Apa jenis harta karun yang dijumpai lelaki itu.
- Bagaimana perasaan lelaki itu ketika dia menjumpai harta karun itu.
- Bagaimana besarnya mutiara itu.
- Sama ada, menjual segala-galanya demi mendapatkan satu mutiara itu adalah suatu risiko yang besar.
- Apa yang akan saya jual untuk mendapatkan sesuatu.

#11 IBARAT TENTANG SEORANG PENYEMAI

TONTON VIDEO <https://tinyurl.com/lbaratPenyemaiTTF>

DENGARKAN PEMBACAAN <https://tinyurl.com/lbaratPenyemaiAud>

Baca Lukas 8:4-15 Alkitab Versi Borneo – AVB

⁴Ketika orang ramai sedang berkumpul, dan orang dari beberapa buah bandar terus-menerus datang kepada-Nya, Dia menceritakan suatu ibarat: ⁵“Seorang penyemai pergi menabur benihnya. Semasa dia menabur, ada yang jatuh di tepi jalan dan dipijak orang lalu dimakan burung di udara. ⁶Ada pula yang jatuh di tempat berbatu, dan setelah bercambah, tumbuhan itu menjadi layu kerana kurangnya air. ⁷Ada pula yang jatuh di tengah-tengah semak duri, lalu semak membesar bersama-sama dan membantutkannya. ⁸Tetapi ada benih yang jatuh di tanah yang subur lalu bertunas dan mengeluarkan hasil seratus ganda.” Kemudian Yesus berseru, “Sesiapa yang bertelinga, dengarlah!”

⁹Murid-murid Yesus bertanya kepada-Nya, “Apakah erti ibarat ini?” ¹⁰Yesus berkata, “Kamu telah diberi anugerah untuk mengetahui rahsia kerajaan syurga, tetapi orang lain diberitahu melalui ibarat, supaya mereka terus melihat tetapi tidak nampak, mereka terus mendengar tetapi tidak mengerti.”

¹¹“Inilah maksud ibarat tadi: Benih itu ialah firman Allah. ¹²Benih yang jatuh di tepi jalan itu menggambarkan mereka yang mendengar firman itu tetapi kemudian Iblis datang dan mengambil firman itu daripada hati mereka supaya mereka tidak percaya dan diselamatkan. ¹³Benih yang jatuh di tempat berbatu itu bermaksud mereka yang mendengar firman itu dan terus menerima firman itu dengan sukacita tetapi mereka tidak berakar.



Mereka itu hanya percaya untuk seketika dan pada waktu dugaan, iman mereka pun luntur. ¹⁴Benih yang jatuh di tengah-tengah semak duri itu ialah mereka yang telah mendengar firman itu, tetapi dalam hidup sehari-hari mereka terhimpit oleh kerunsingan dan kekayaan serta kesenangan hidup sehingga mereka tidak menghasilkan buah yang matang. ¹⁵Benih yang ditabur di tanah yang baik bermaksud orang yang mendengar firman itu dan menyimpannya dalam hati yang tulus ikhlas lalu dengan usaha tekun dia mengeluarkan buah.”

SAYA TERTANYA-TANYA

- Mengapa Yesus menggunakan perumpamaan untuk mengajar.
- Bagaimana rasanya menjadi petani.
- Apa jenis benih yang ditaburkan oleh petani itu.
- Tanah itu merujuk kepada siapa.
- Saya jenis tanah apa.
- Bagaimana saya boleh menjadi tanah yang baik.
- Apa yang saya dapat pelajari dari cerita ini.



#12 YESUS MEMBERI MAKAN KEPADA 5000 ORANG

TONTON VIDEO <https://tinyurl.com/YesusMemberiMakanTTF>

DENGARKAN PEMBACAAN <https://tinyurl.com/YesusMemberiMakanAud>

Baca Yohanes 6:1-15 Alkitab Versi Borneo – AVB

¹Setelah itu, Yesus pergi ke seberang Laut Galilea yang juga dipanggil Laut Tiberias. ²Ramai orang mengikut-Nya setelah melihat mukjizat-Nya menyembuhkan orang sakit. ³Yesus mendaki sebuah bukit lalu duduk di situ bersama murid-murid-Nya. ⁴Pada masa itu Perayaan Paskah orang Yahudi hampir tiba.

⁵Apabila Yesus memandang sekeliling dan melihat ramai orang datang ke arah-Nya, Dia berkata kepada Filipus, “Dari manakah dapat kita beli makanan untuk semua mereka ini?” ⁶(Sebenarnya Yesus bertanya itu untuk menduga Filipus sahaja kerana Dia tahu apa yang akan dilakukan-Nya.) ⁷Filipus menjawab, “Roti yang berharga dua ratus dinar pun tidak cukup, meskipun jika dibahagi secebis seorang.”

⁸Seorang lagi murid Yesus yang bernama Andreas, saudara Simon Petrus, berkata kepada-Nya, ⁹” Ada seorang budak di sini yang mempunyai lima buku roti barli dan dua ekor ikan. Tetapi tidak mungkin akan cukup untuk orang seramai ini!”

¹⁰Yesus berkata kepada murid-murid-Nya, “Ajaklah mereka duduk.” (Di situ ada banyak rumput.) Mereka itu pun duduk, kira-kira lima ribu orang semuanya. ¹¹Yesus mengambil roti itu lalu mengucap syukur kepada Allah. Selepas itu, Dia membahagi-bahagikan roti itu kepada mereka yang duduk di sini. Kemudian Dia membahagi-bahagikan ikan itu pula



sebanyak yang dikehendaki mereka. ¹²Setelah kenyang semuanya, Yesus berkata kepada murid-murid-Nya, “Kumpulkanlah baki makanan, jangan ada yang terbuang.” ¹³Lalu mereka mengumpulkannya dan mengisi dua belas bakul baki makanan daripada lima buku roti barli yang dimakan oleh orang ramai itu.

¹⁴Apabila mereka melihat mukjizat yang dilakukan oleh Yesus itu, mereka pun berkata, “Memang Dialah Nabi yang dinanti-nantikan datang ke dunia!”

¹⁵Yesus tahu bahawa mereka hendak datang dan memaksa-Nya menjadi raja. Oleh itu, Dia beredar sekali lagi ke bukit seorang diri.

SAYA TERTANYA-TANYA

- Mengapa sangat ramai orang mengikut Yesus.
- Bagaimana 5000 orang itu dapat mendengar Yesus bercakap.
- Bagaimana Andreas mendapat tahu bahawa budak lelaki itu ada membawa makanan bersamanya.
- Berapa umur budak lelaki itu.
- Bagaimana perasaan murid-murid Yesus ketika Yesus menyuruh mereka mengajak orang ramai itu duduk.
- Bagaimana mukjizat itu berlaku.
- Bagaimana perasaan orang ramai dan murid-murid Yesus ketika melihat dan mengalami mukjizat itu.
- Mengapa orang ramai mahu menjadikan Yesus raja.

#13 PEREMPUAN YANG BERZINA

TONTON VIDEO <https://tinyurl.com/PerempuanBerzinaTTF>

DENGARKAN PEMBACAAN <https://tinyurl.com/PerempuanBerzinaAud>

Baca Yohanes 8:1-11 Alkitab Versi Borneo – AVB

¹Akan tetapi, Yesus pergi ke Bukit Zaitun.


²Pada keesokan harinya, pagi-pagi lagi Dia masuk ke Bait Suci. Semua orang di situ datang kepada-Nya. Dia duduk lalu mengajar mereka. ³Ahli Taurat dan orang Farisi membawa kepada Yesus seorang perempuan yang didapati berzina. Mereka membuat perempuan itu berdiri di hadapan semua orang di situ.

⁴Mereka berkata kepada Yesus, “Guru, perempuan ini ditangkap ketika berzina.

⁵Dalam hukum Taurat, Musa memberikan perintah supaya perempuan demikian direjam sampai mati. Bagaimanakah pendapat-Mu?”


⁶Mereka bertanya demikian untuk menduga Yesus supaya mempunyai alasan untuk menuduh-Nya. Tetapi Yesus tunduk menulis di tanah dengan jari-Nya. ⁷Mereka tetap mengulangi pertanyaan itu. Oleh yang demikian, Yesus meluruskan badan-Nya lalu berkata kepada mereka, “Sesiapa di antaramu yang tidak berdosa, hendaklah dia yang pertama merejam batu kepadanya.”

⁸Kemudian Yesus tunduk menulis semula di tanah. ⁹Setelah mendengar kata-kata Yesus, seorang demi seorang, bermula dengan yang tertua, beredar dari situ. Akhirnya hanya Yesus dan perempuan itu yang tinggal.



¹⁰Yesus meluruskan badan-Nya lalu berkata kepada perempuan itu, “Di manakah mereka? Tidak adakah orang yang mengutukmu?” ¹¹Perempuan itu menjawab, “Tidak ada, Tuhan.” Yesus berkata, “Aku pun tidak menghukummu. Pergilah, jangan berbuat dosa lagi.”

SAYA TERTANYA-TANYA

- Bagaimana ahli Taurat dan orang Farisi mendapat tahu tentang perempuan itu.
 - Apa yang mereka jangka Yesus akan lakukan.
 - Mengapa mereka mahu menduga Yesus.
 - Bagaimana perasaan perempuan itu ketika berdiri di hadapan semua orang.
 - Apa yang Yesus tulis di tanah pada kali pertama dan kedua.
 - Mengapa tiada seorang pun merejam batu yang pertama kepada perempuan itu.
 - Bagaimana rasanya jika direjam batu.
 - Bagaimana perasaan perempuan itu ketika Yesus tidak menghukumnya.
- 

#14 YESUS MENYEMBUHKAN SEORANG LELAKI YANG BUTA SEJAK LAHIR

TONTON VIDEO <https://tinyurl.com/PenyembuhanTTF>

DENGARKAN PEMBACAAN <https://tinyurl.com/PenyembuhanAud>

Baca Yohanes 9:1-12 Alkitab Versi Borneo – AVB

¹Ketika Yesus sedang lalu di suatu tempat, Dia terpendang seorang lelaki yang buta sejak lahir. ²Para murid-Nya bertanya, “Rabbi, siapakah yang berdosa, orang itu atau ibu bapanya, maka dia dilahirkan buta?”



³Yesus menjawab, “Bukan dosa dia dan bukan juga dosa ibu bapanya. Dia begitu supaya kuasa Allah dapat dinyatakan melaluinya. ⁴Selagi siang, kita mesti melakukan tugas Dia yang telah mengutus-Ku. Malam akan tiba apabila seorang pun tidak dapat melakukan apa-apa lagi. ⁵Selama Aku di dunia, Akulah cahaya dunia.”

⁶Selepas itu, Yesus berludah ke tanah untuk membuat tanah liat lalu menyapukannya pada mata orang itu. ⁷Yesus berkata kepadanya, “Pergilah basuh mukamu di Kolam Siloam” (Siloam bererti “diutus” dalam bahasa Ibrani). Orang itu pun pergi membasuh muka. Apabila dia kembali, dia sudah dapat melihat.


⁸Jiran tetangga dan semua orang yang tahu dia buta bertanya, “Bukankah orang ini yang selalu duduk meminta sedekah?”

⁹Ada yang berkata, “Ya, dialah.” Ada pula yang berkata, “Bukan, hanya serupa dengannya.” Tetapi orang itu sendiri mengaku, “Akulah orang itu.”

¹⁰Mereka bertanya kepadanya, “Bagaimanakah sekarang kamu dapat melihat?” ¹¹Dia menjawab, “Orang yang bernama Yesus telah membuat secebis tanah liat, disapukan-Nya ke matakuku lalu berkata,

'Pergilah basuh mukamu di Kolam Siloam.' Sebaik-baik sahaja aku membasuh muka di kolam itu, aku pun dapat melihat." ¹²Mereka bertanya, "Di manakah orang itu?" Dia menjawab, "Aku tidak tahu."

SAYA TERTANYA-TANYA

- Mengapa lelaki itu dilahirkan buta.
 - Bagaimana rasanya buta.
 - Apa maksud Yesus ketika Dia berkata, "Akulah cahaya dunia."
 - Mengapa Yesus menggunakan air liur-Nya untuk membuat tanah liat.
 - Bagaimana perasaan lelaki itu ketika dia dapat melihat untuk pertama kalinya.
 - Apa yang pertama sekali dilihat oleh lelaki itu.
 - Mengapa jiran-jirannya tidak dapat mengenalinya.
 - Mengapa orang ramai ingin mengetahui di mana Yesus berada.
- 

#15 REAKSI TERHADAP PENYEMBUHAN ORANG BUTA

TONTON VIDEO <https://tinyurl.com/ReaksiPenyembuhanTTF>

DENGARKAN PEMBACAAN <https://tinyurl.com/ReaksiPenyembuhanAud>

Baca Yohanes 9:13-34 Alkitab Versi Borneo – AVB

¹³Orang yang dahulunya buta itu dibawa mereka kepada orang Farisi.

¹⁴Yesus telah membuat tanah liat dan menyembuhkan mata orang itu pada hari Sabat. ¹⁵Orang Farisi menanya orang itu bagaimana dia dapat melihat. Jawabnya, “Dia menyapukan tanah liat pada mataku, lalu aku membasuh muka, dan kemudian aku dapat melihat.”

¹⁶Sebilangan orang Farisi itu berkata, “Dia bukan daripada Allah, kerana Dia melanggar peraturan hari Sabat.” Tetapi ada pula yang berkata, “Kalau Dia orang berdosa, bagaimana Dia dapat melakukan mukjizat begini?” Dengan demikian timbullah perselisihan pendapat dalam kalangan mereka.

¹⁷Orang Farisi bertanya lagi kepada orang yang dahulunya buta itu, “Kamu berkata Dia menyembuhkan matamu. Bagaimana pendapatmu tentang Dia?” Orang itu menjawab, “Dia seorang nabi.” ¹⁸Orang Yahudi enggan percaya bahawa orang itu dahulu buta matanya. Oleh itu, mereka memanggil ibu bapanya. ¹⁹Mereka bertanya, “Benarkah dia anak kamu yang buta sejak lahir? Bagaimana pula dia boleh celik?”

²⁰Ibu bapa orang itu menjawab, “Ya, benar dia anak kami yang buta sejak lahir.

²¹Tetapi kami tidak tahu bagaimana dia dapat melihat sekarang dan siapa yang menyembuhkan matanya. Dia sudah dewasa, tanyalah dia. Dia dapat menjawab sendiri.” ²²Ibu bapa orang itu berkata demikian kerana takut akan orang Yahudi itu yang telah bersetuju



bahawa sesiapa yang mengakui Yesus itu Kristus akan disingkirkan daripada saumaah.

²³Maka oleh itulah ibu bapanya berkata, “Dia sudah dewasa, tanyalah dia.” ²⁴Mereka pun memanggil orang itu lagi dan berkata, “Akuilah kemuliaan Allah! Kamu tahu Dia itu orang berdosa.” ²⁵Dia menjawab, “Sama ada Dia orang berdosa atau tidak, aku tidak tahu. Yang kutahu, dahulu aku buta, sekarang aku dapat melihat.”

²⁶Mereka bertanya lagi, “Apa yang dibuat-Nya kepadamu? Bagaimana Dia mencelikkan matamu?” ²⁷Dia menjawab, “Aku telah pun memberitahumu, tetapi kamu tidak mendengar. Mengapakah kamu hendak mendengarnya lagi? Adakah kamu ingin menjadi murid-Nya juga?” ²⁸Mereka mencacinya dan berkata, “Kamulah murid-Nya. Kami murid Musa.

²⁹Kami tahu Allah berfirman kepada Musa. Orang itu, tiada siapa yang tahu dari mana Dia datang.”

³⁰ “Hairan sekali,” kata orang yang dahulunya buta itu. “Kamu tidak tahu dari mana Dia datang, tetapi Dia telah mencelikkan mataku! ³¹Kita tahu bahawa Allah tidak mendengar permintaan orang berdosa. Tetapi jika seseorang takut akan Allah dan melakukan kehendak-Nya, Allah akan mendengar permintaannya.

³²Sejak permulaan dunia, belum pernah kedengaran kisah orang yang dapat mencelikkan mata orang yang buta sejak lahir. ³³Jika orang itu bukan daripada Allah, tidaklah dapat Dia melakukannya.”

³⁴Mereka berkata kepadanya, “Kamu orang berdosa sejak lahir. Kamu hendak cuba mengajar kami?” Mereka pun menghalaunya keluar.

SAYA TERTANYA-TANYA

- Mengapa mereka membawa lelaki itu kepada orang Farisi.
- Tentang apakah hari Sabat itu.
- Mengapa orang Farisi tidak berasa gembira kerana orang buta itu sudah celik.
- Mengapa orang Farisi tidak menyukai Yesus.
- Bagaimana perasaan lelaki itu apabila perlu menjawab soalan-soalan orang Farisi berulang kali.
- Mengapa orang Farisi tidak percaya bahawa lelaki itu boleh sembuh daripada kebutaan fizikalnya.
- Sama ada benar atau tidak, Allah tidak mahu mendengar doa orang berdosa.
- Apa fikiran orang yang dahulunya buta itu tentang Yesus.




#16 AKULAH GEMBALA YANG BAIK

TONTON VIDEO <https://tinyurl.com/GembalaBaikTTF>

DENGARKAN PEMBACAAN <https://tinyurl.com/GembalaBaikAud>

Baca Yohanes 10:1-18 Alkitab Versi Borneo – AVB

¹“Sesungguhnya, Aku berkata kepadamu, jika seseorang memasuki kandang domba dengan cara lain, bukan melalui pintu, orang itu pencuri dan perompak. ²Orang yang masuk melalui pintu ialah gembala domba. ³Penjaga kandang membuka pintu untuknya, dan kawan domba itu mendengar suaranya. Dia memanggil nama setiap dombanya. Gembala itu pun memimpin domba-domba itu keluar.



⁴Setelah semua domba keluar, gembala itu berjalan di hadapan dan domba-domba mengikutnya kerana mengenal suaranya. ⁵Kawan domba itu tidak akan mengikut orang lain, malah akan lari daripadanya, kerana tidak mengenal suaranya.”

⁶Yesus bercerita secara kiasan, tetapi mereka tidak faham akan maksud-Nya. ⁷Oleh yang demikian, Yesus berkata, “Sesungguhnya, Aku berkata kepadamu, Akulah pintu bagi kawan domba itu. ⁸Orang yang datang sebelum Aku ialah pencuri dan perompak, tetapi kawan domba tidak mengikut suara mereka. ⁹Akulah pintu. Sesiapa yang masuk melalui-Ku akan diselamatkan. Dia boleh keluar masuk, dan dia akan dapat mencari padang rumput. ¹⁰Pencuri datang untuk mencuri, membunuh dan membinasakan. Tetapi Aku datang supaya manusia mempunyai hidup bahkan mempunyai hidup yang berlimpah-limpah.

¹¹Akulah gembala yang baik. Gembala yang baik mengorbankan nyawanya untuk kawan dombanya. ¹²Orang upahan yang bukan gembala atau

pemilik kawan domba itu akan lari apabila melihat serigala datang. Maka serigala menerkam domba itu dan menyebabkannya lari bertempiran.

¹³Orang upahan itu lari kerana dia bekerja semata-mata untuk mendapat upah. Dia tidak peduli akan kawan domba itu. ¹⁴Akulah gembala yang baik. Aku mengenal domba-domba-Ku dan domba-domba-Ku mengenal-Ku, ¹⁵seperti Bapa mengenal-Ku, dan Aku mengenal-Nya. Aku mengorbankan nyawa-Ku untuk domba-domba-Ku.

¹⁶Aku miliki domba-domba lain yang bukan daripada kawan ini. Mereka juga mesti Kupimpin, dan mereka akan mengikut suara-Ku. Kesemuanya akan menjadi satu kawan dengan satu gembala.

¹⁷Bapa mengasihi-Ku kerana Aku sanggup menyerahkan nyawa-Ku agar dapat mengambilnya semula nanti. ¹⁸Sesiapa pun tidak dapat meragut nyawa-Ku. Aku menyerahkannya dengan rela. Aku berkuasa menyerahkan nyawa-Ku dan berkuasa mengambilnya semula. Inilah perintah yang Kuterima daripada Bapa-Ku.”

SAYA TERTANYA-TANYA

- Bagaimana domba mengenal suara si gembala domba.
- Bagaimana Yesus menjadi pintu kepada domba.
- Apa maksudnya mempunyai hidup yang berlimpah-limpah.
- Mengapa Yesus menyebut diri-Nya sebagai gembala yang baik.
- Mengapa Gembala yang baik itu mengorbankan nyawa-Nya untuk domba-domba-Nya.
- Di mana domba yang lain.
- Apa maksud Yesus ketika berkata, Dia menyerahkan nyawa-Nya hanya untuk mengambilnya semula.
- Sama ada Yesus tahu nama saya.

#17 KEMATIAN LAZARUS

TONTON VIDEO <https://tinyurl.com/KematianLazarusTTF>

DENGARKAN PEMBACAAN <https://tinyurl.com/KematianLazarusAud>

Baca Yohanes 11:1-16 Alkitab Versi Borneo – AVB

¹Pada suatu ketika, seorang lelaki bernama Lazarus jatuh sakit. Dia tinggal di Betania bersama dua orang saudara perempuannya bernama Maria dan Marta. ²Maria, yang saudaranya Lazarus sedang sakit, merupakan seorang perempuan yang dahulu pernah menuangkan minyak wangi ke kaki Tuhan dan menyapunya dengan rambutnya. ³Kedua-dua beradik perempuan itu mengirim khabar kepada Yesus, “Tuhan, dia yang Kaukasihi itu sakit.”

⁴Apabila menerima berita itu, Yesus berkata, “Sakit Lazarus tidak akan membawa maut. Hal ini berlaku untuk memuliakan Allah. Disebabkan kejadian ini Anak Allah akan dimuliakan.”

⁵Yesus mengasihi Marta, Maria dan Lazarus. ⁶Tetapi apabila Dia mendapat berita Lazarus sakit, Dia sengaja tinggal di tempat itu dua hari lagi.

⁷Kemudian Dia berkata kepada murid-murid-Nya, “Marilah kita pulang ke Yudea.” ⁸Para murid-Nya menjawab, “Rabbi, bukankah orang Yahudi di situ baru sahaja hendak merejam-Mu? Sekarang Engkau hendak pulang ke situ?” ⁹Yesus berkata, “Bukankah waktu siang dua belas jam lamanya? Orang yang berjalan pada waktu siang tidak akan tersandung kakinya, kerana masih ada cahaya di dunia ini.

¹⁰Tetapi jika dia berjalan pada waktu malam, kakinya akan tersandung kerana sudah tiada cahaya lagi.” ¹¹Kemudian Yesus menambah, “Sahabat kita Lazarus sedang tidur. Aku akan pergi membangunkannya.”

¹²Para murid Yesus berkata, “Tuhan, sekiranya Lazarus tidur, dia akan sembuh.”



¹³Yang dimaksudkan oleh Yesus ialah Lazarus sudah meninggal dunia, tetapi murid-murid-Nya mengambil erti tidur yang biasa. ¹⁴Oleh itu, Yesus berkata kepada mereka dengan jelas, “Lazarus sudah meninggal. ¹⁵Tetapi, untuk kebaikanmu, Aku bersyukur Aku tidak bersamanya ketika itu. Dengan demikian kamu akan percaya kepada-Ku. Marilah kita pergi kepadanya.”

¹⁶Tomas yang disebut Didimus berkata kepada murid Yesus yang lain. “Ya, marilah kita pergi juga supaya kita mati bersama-Nya!”

SAYA TERTANYA-TANYA

- Mengapa kedua-dua beradik perempuan itu mengirim berita kepada Yesus bahawa Lazarus sakit.
- Mengapa Yesus menunggu dua hari lagi sebelum pergi menemui Lazarus.
- Mengapa orang Yahudi mahu merejam Yesus.
- Bagaimana Yesus tahu bahawa Lazarus sudah mati.
- Mengapa Yesus berkata Lazarus sedang tidur.
- Bagaimana Anak Allah dimuliakan melalui penyakit dan kematian Lazarus.
- Mengapa Tomas berkata mereka akan mati bersama-sama Yesus.

#18 AKULAH KEBANGKITAN DAN HIDUP

TONTON VIDEO <https://tinyurl.com/KebangkitandanHidupTTF>

DENGARKAN PEMBACAAN <https://tinyurl.com/KebangkitandanHidupAud>

Baca Yohanes 11:17-27 Alkitab Versi Borneo- AVB

¹⁷Ketika Yesus sampai, Dia mendapati Lazarus sudah empat hari di dalam makam. ¹⁸Betania terletak kira-kira dua batu dari Yerusalem. ¹⁹Oleh itu, ramai orang Yahudi datang melawat Maria dan Marta untuk melipurkan hati mereka yang duka kerana kematian Lazarus.

²⁰Apabila Marta mendengar Yesus datang, dia terus pergi untuk menyambut-Nya, manakala Maria tinggal di rumah. ²¹Marta berkata kepada Yesus, “Ya Tuhan, kalaulah Engkau ada di sini pada waktu itu, tentu saudaraku masih hidup! ²²Aku tahu, sekarang pun apa sahaja permintaan-Mu akan dikabulkan Allah.” ²³Yesus berkata kepada Marta, “Saudaramu akan hidup kembali.”

²⁴Marta menjawab, “Aku tahu Lazarus akan hidup kembali pada hari akhir.” ²⁵Yesus berkata kepada Marta, “Akulah kebangkitan dan hidup. Sesiapa yang percaya kepada-Ku akan hidup, meskipun dia sudah mati. ²⁶Orang hidup yang percaya kepada-Ku tidak akan mati selama-lamanya. Percayakah kamu?”

²⁷Marta menjawab, “Ya Tuhan, aku percaya bahawa Engkau adalah Kristus, Anak Allah, yang diutus oleh Allah, dan yang akan datang ke dunia ini.”



SAYA TERTANYA-TANYA

- Berapa umur Lazarus sewaktu dia meninggal dunia.
- Bagaimana rasanya kehilangan abang atau kakak.
- Sama ada Maria, Marta dan Lazarus pernah bertengkar antara satu sama lain.
- Bagaimana perasaan Marta sewaktu Yesus lambat datang kepada mereka.
- Apa maksud Yesus sewaktu Dia berkata, Dia adalah kebangkitan dan hidup.
- Mengapa Yesus berkata jika kita percaya kepada-Nya, kita tidak akan pernah mati.
- Siapa Mesias itu.



#19 YESUS MENANGIS

TONTON VIDEO <https://tinyurl.com/YesusMenangisTTF>

DENGARKAN PEMBACAAN <https://tinyurl.com/YesusMenangisAud>



Baca Yohanes 11:28-37 Alkitab Versi Borneo- AVB

²⁸Setelah itu, Marta pergi memanggil saudaranya Maria dan berbisik kepadanya, “Guru ada di sini. Dia memanggilmu.” ²⁹Maria pun segera bangun lalu pergi untuk berjumpa dengan Yesus. ³⁰Pada waktu itu Yesus belum sampai di kampung mereka. Dia masih di tempat Marta menyambut-Nya. ³¹Apabila orang Yahudi yang ada di rumah Maria untuk melipurkan hatinya itu melihat dia segera bangun lalu keluar, mereka pun mengikutnya kerana menyangka dia hendak ke makam Lazarus untuk menangisnya.

³²Setelah Maria melihat Yesus, dia berlutut di kaki-Nya lalu berkata, “Tuhan, kalaulah Engkau ada di sini pada waktu itu, tentu saudaraku masih hidup!” ³³Ketika melihat Maria menangis dan semua orang Yahudi yang bersamanya, turut mengalirkan air mata, Yesus sungguh hiba dan terharu.

³⁴Dia bertanya kepada mereka, “Di manakah kamu letakkan dia?” Mereka menjawab, “Marilah lihat, ya Tuhan.” ³⁵Yesus menangis. ³⁶Semua orang Yahudi yang hadir berkata, “Lihatlah! Dia sungguh kasih akan Lazarus.” ³⁷Namun demikian, ada yang berkata, “Dia dapat mencelikkan orang buta. Tidakkah Dia dapat mengelakkan kematian Lazarus?”

SAYA TERTANYA-TANYA

- Mengapa Marta memanggil Yesus, Guru.
- Berapa ramai orang yang berada di sana untuk melipurkan hati Maria dan Marta.
- Mengapa Maria berlutut di kaki Yesus.
- Mengapa Yesus berasa sungguh hiba dan terharu.
- Mengapa Yesus menangis.
- Apa penyakit Lazarus.
- Apa yang Maria dan orang ramai harapkan daripada Yesus.

#20 YESUS MEMBANGKITKAN LAZARUS

TONTON VIDEO <https://tinyurl.com/YesusMembangkitkanLazarusTTF>

DENGARKAN PEMBACAAN <https://tinyurl.com/YesusMembangkitkanLazarusAud>


Baca Yohanes 11:38-44 Alkitab Versi Borneo- AVB

³⁸Yesus yang masih terharu pergi ke makam Lazarus, iaitu sebuah gua yang ditutup dengan batu besar. ³⁹Yesus berkata, “Alihkan batu itu.” Tetapi Marta, saudara perempuan kepada orang yang meninggal itu, berkata, “Tuhan, sudah empat hari dia dimakamkan, tentu berbau.”

⁴⁰Yesus berkata kepada Marta, “Bukankah sudah Kukatakan kepadamu, kalau kamu percaya, kamu dapat melihat kemuliaan Allah?”

⁴¹Mereka mengalihkan batu itu. Yesus menengadah ke langit lalu berkata, “Ya Bapa, Aku bersyukur kepada-Mu kerana Engkau mendengar permintaan-Ku. ⁴²Aku tahu Engkau memang sentiasa mendengar permintaan-Ku. Aku menyebutnya untuk kebaikan semua orang di sini, supaya mereka percaya Engkau mengutus-Ku.”

⁴³Selepas itu, Yesus berseru lantang, “Lazarus, keluar!” ⁴⁴Lazarus pun keluar. Tangan dan kakinya masih berbalut kain kafan, mukanya masih dilitupi kain penutup muka. Yesus berkata kepada orang ramai di situ, “Lucutkan kain kafannya dan lepaskan dia.”



SAYA TERTANYA-TANYA

- Siapa yang berada di makam itu.
- Apa perasaan orang ramai ketika mereka mengalihkan batu itu.
- Sama ada, ada bau busuk semasa kubur dibuka.
- Bagaimana rasanya mati.
- Bagaimana Yesus berseru dengan lantang.
- Bagaimana rasanya dibangkitkan daripada kematian.
- Bagaimana sebenarnya Yesus membangkitkan Lazarus.



#21 MARIA MENGURAPI YESUS DI BETANIA

TONTON VIDEO <https://tinyurl.com/MariaMengurapiYesusTTF>


DENGARKAN PEMBACAAN <https://tinyurl.com/MariaMengurapiYesusAud>

Baca Yohanes 12:1-8 Alkitab Versi Borneo – AVB

¹Enam hari sebelum Perayaan Paskah, Yesus pergi ke Betania, tempat tinggal Lazarus yang telah dibangkitkan-Nya daripada kematian. ²Di situ Dia diperjamu. Marta menghidangkan makanan, dan Lazarus serta tetamu lain duduk bertelekan di meja bersama Yesus.

³Kemudian Maria membawa sepaun minyak narwastu murni yang mahal, dan menuangkannya ke kaki Yesus, lalu menyapu kaki Yesus dengan rambutnya. Semerbaklah keharuman minyak itu di seluruh rumah. ⁴Yudas Iskariot, salah seorang murid Yesus yang mengkhianati-Nya kelak berkata, ⁵“Mengapakah minyak wangi ini tidak dijual dengan harga tiga ratus keping wang dinar, supaya wangnya dapat disedekahkan kepada orang miskin?”

⁶Yudas berkata demikian bukanlah kerana dia prihatin terhadap orang miskin, tetapi kerana dia yang diamanahkan menyimpan wang bagi mereka sering mencuri sedikit untuk keperluannya. ⁷Yesus berkata, “Biarkan dia begitu. Apa yang dilakukannya dimaksudkan untuk hari pengebumian-Ku. ⁸Orang miskin sentiasa ada di sekitarmu, tetapi Aku tidaklah sentiasa bersamamu.”



SAYA TERTANYA-TANYA

- Apa yang mereka makan untuk makan malam.
- Bagaimana perasaan Lazarus, sewaktu dia hidup semula.
- Mengapa Maria menuang minyak wangi yang mahal ke kaki Yesus.
- Mengapa Maria menyapu kaki Yesus dengan menggunakan rambutnya.
- Panjang mana rambut Maria.
- Bagaimana perasaan Yudas selepas mencuri wang untuk keperluannya sendiri.
- Jika Yesus mengambil berat kepada orang miskin.

#22 YESUS MEMBASUH KAKI MURID-MURID-NYA

TONTON VIDEO <https://tinyurl.com/YesusBasuhKakiTTF>

DENGARKAN PEMBACAAN <https://tinyurl.com/YesusBasuhKakiAud>


Baca Yohanes 13:1-17 Alkitab Versi Borneo – AVB

¹Sebelum Perayaan Paskah, Yesus tahu bahawa telah sampai masanya Dia meninggalkan dunia ini dan pulang kepada Bapa. Setelah mengasihi sekalian orang yang menjadi milik-Nya di dunia ini, Yesus mengasihi mereka hingga ke saat akhir.

²Semasa Yesus dan murid-murid-Nya sedang makan malam, Iblis sudah pun menimbulkan niat dalam hati Yudas anak Simon Iskariot untuk mengkhianati Yesus. ³Yesus tahu bahawa Bapa telah menyerahkan segala perkara kepada-Nya; bahawa Dia datang daripada Allah dan akan pulang kepada-Nya. ⁴Dengan demikian, Yesus berdiri lalu melucutkan jubah-Nya dan mengikat sehelai tuala di pinggang-Nya. ⁵Kemudian Dia menuang air ke dalam sebuah baldi lalu membasuh kaki murid-murid-Nya dan mengeringkannya dengan tuala di pinggang-Nya. ⁶Ketika Dia sampai kepada Simon Petrus, bertanyalah Simon kepada-Nya, “Tuhan, wajarkah Engkau membasuh kakiku?”

⁷Yesus menjawab, “Sekarang kamu tidak mengerti perbuatan-Ku ini tetapi pada kemudian hari kamu akan mengerti.”

⁸Petrus berkata kepada Yesus, “Tidak! Engkau sekali-kali tidak boleh membasuh kakiku!” Namun demikian, Yesus menjawab, “Jika Aku tidak membasuhmu, kamu tidaklah lagi mempunyai bahagian dalam apa yang Kulakukan.”



⁹Simon Petrus berkata, “Tuhan, kalau begitu janganlah basuh kakiku sahaja, basuhlah tangan dan kepalaku juga!”¹⁰Yesus berkata kepadanya, “Orang yang sudah mandi telah bersih seluruh tubuhnya, cuma kakinya yang perlu dibasuh. Kamu memang bersih tetapi bukan semua kamu.”¹¹Yesus tahu siapa yang akan mengkhianati-Nya. Itulah sebabnya Dia berkata, “Bukan semua yang bersih.”

¹²Setelah membasuh kaki murid-murid-Nya, Yesus memakai semula jubah-Nya dan kembali ke tempat-Nya di meja. Lalu Dia berkata kepada mereka, “Fahamkah kamu apa yang Kulakukan untukmu?”¹³Kamu memanggil-Ku Guru dan Tuhan. Tepatlah panggilanmu itu, kerana Aku memang Guru dan Tuhan.¹⁴Jika Aku sebagai Tuhan dan Gurumu sanggup membasuh kaki kamu, maka haruslah kamu saling membasuh kaki sesama sendiri.¹⁵Aku telah memberi teladan kepada kamu semua. Lakukanlah apa yang telah Kulakukan untukmu.¹⁶Sesungguhnya, Aku berkata kepadamu, seorang hamba tidak lebih besar daripada tuannya. Begitu jugalah, seorang yang diutus tidak mungkin lebih besar daripada orang yang mengutusnyanya.¹⁷Sekiranya kamu mengerti hal ini dan melakukannya, diberkatilah kamu.

SAYA TERTANYA-TANYA

- Mengapa Yesus membasuh kaki murid-murid-Nya.
- Bagaimana perasaan Yesus ketika mencuci kaki Yudas.
- Mengapa Yudas ingin mengkhianati Yesus.
- Sama ada Yudas mempunyai pilihan.
- Bagaimana perasaan Yesus tentang hal dikhianati.
- Mengapa Petrus pada mulanya tidak mahu Yesus membasuh kakinya.
- Bagaimana perasaan saya jika Yesus membasuh kaki saya.

#23 AKULAH JALAN, KEBENARAN DAN HIDUP

TONTON VIDEO <https://tinyurl.com/JalanKebenaranDnHidupTTF>

DENGARKAN PEMBACAAN <https://tinyurl.com/JalanKebenaranDnHidupAud>

Baca Yohanes 14:1-11 Alkitab Versi Borneo – AVB

¹“Janganlah resah hatimu. Percayalah kepada Allah dan percayalah juga kepada-Ku. ²Di dalam rumah Bapa-Ku ada banyak tempat tinggal. Jika hal ini tidak benar, tidaklah Kukatakan kepadamu. Aku akan pergi menyediakan tempat untukmu. ³Jika Aku pergi dan menyediakan tempat untukmu, Aku akan pulang dan membawamu ke tempat-Ku, supaya di tempat Aku berada di situ juga kamu berada. ⁴Kamu tahu jalan ke tempat Aku pergi.”


⁵Tomas berkata kepada Yesus, “Tuhan, kami tidak tahu ke mana Engkau pergi, bagaimana kami mungkin tahu jalan ke sana?”

⁶Yesus menjawab, “Akulah jalan, kebenaran dan hidup. Tiada seorang pun datang kepada Bapa kecuali melalui-Ku. ⁷Dengan mengenal-Ku, kamu mengenal Bapa-Ku juga. Mulai sekarang kamu mengenal-Nya, malah sudah pun melihat-Nya.”

⁸Filipus berkata kepada Yesus, “Tuhan, tunjukkanlah Bapa kepada kami, supaya puaslah hati kami.”

⁹Yesus menjawab, “Sekian lama Aku bersama kamu semua, belum lagi kaukenal Aku, Filipus? Sesiapa yang telah melihat-Ku, telah melihat Bapa. Mengapa kamu berkata, 'Tunjukkanlah Bapa kepada kami?'

¹⁰Filipus, tidakkah kamu percaya bahawa Aku di dalam Bapa, dan Bapa di dalam-Ku? Segala yang



Kukatakan kepadamu bukanlah daripada-Ku, tetapi daripada Bapa yang tinggal di dalam-Ku yang melakukan semua pekerjaan itu. ¹¹Percayalah kepada-Ku, bahawa Aku di dalam Bapa, dan Bapa di dalam-Ku. Kalaupun kamu tidak percaya akan apa yang Kukatakan, percayalah kepada-Ku kerana apa yang telah Kulakukan.

SAYA TERTANYA-TANYA

- Mengapa hati murid-murid Yesus resah.
- Berapa banyak tempat tinggal yang ada di rumah Bapa.
- Apa jenis tempat tinggal di sana.
- Apa jenis persediaan yang Yesus perlu lakukan.
- Apa maksud Yesus dengan – ‘Tiada seorang pun datang kepada Bapa kecuali melalui-Ku.’
- Mengapa melihat Yesus, sama seperti melihat Bapa.
- Bila Yesus akan kembali lagi.

#24 AKULAH POKOK ANGGUR YANG BENAR

TONTON VIDEO <https://tinyurl.com/PokokAnggurTTF>

DENGARKAN PEMBACAAN <https://tinyurl.com/PokokAnggurAud>

Baca Yohanes 15:1-11 Alkitab Versi Borneo – AVB

¹“Aku ini pokok anggur yang benar, dan Bapa-Ku peladang anggur. ²Dia mengerat setiap ranting-Ku yang tidak berbuah, dan mencantas setiap ranting-Ku yang berbuah supaya berbuah lebih lebat lagi. ³Kamu sudah dibersihkan dengan ajaran yang Kusampaikan kepadamu. ⁴Tetaplah di dalam-Ku seperti Aku di dalammu. Ranting tidak dapat berbuah jika terpisah dari pokok anggur. Demikian jugalah kamu: Kamu dapat berbuah hanya jika kamu tetap di dalam-Ku.

⁵Aku pokok anggur dan kamu ranting-rantingnya. Jika kamu tetap di dalam-Ku dan Aku di dalammu, kamu akan berbuah lebat. Tanpa-Ku, kamu tidak dapat menghasilkan apa-apa. ⁶Sesiapa yang tidak tetap di dalam-Ku adalah seperti ranting yang dikerat lalu dibiarkan kering, kemudian dikumpulkan, dan dibuang ke dalam api lalu dibakar. ⁷Sekiranya kamu tetap di dalam-Ku, dan kata-kata-Ku tetap di dalammu, mintalah apa sahaja yang kamu kehendaki, permohonan itu akan dikabulkan. ⁸Kemuliaan Bapa ternyata apabila kamu berbuah lebat. Itulah tanda kamu benar-benar murid-Ku. ⁹Sebagaimana Bapa mengasihi-Ku, demikianlah juga Aku mengasihimu. Tetaplah dalam kasih-Ku.

¹⁰Jika kamu menurut perintah-Ku, kamu akan tetap dalam kasih-Ku; sebagaimana Aku menurut perintah Bapa dan tetap dalam kasih-Nya. ¹¹Aku berkata demikian kepadamu supaya kebahagiaan-Ku ada dalam dirimu dan sempurnalah kebahagiaanmu.



SAYA TERTANYA-TANYA

- Apa perasaan saya jika pokok anggur saya tidak berbuah.
- Mengapa ada ranting-ranting yang tidak berbuah.
- Mengapa tukang kebun memotong ranting-ranting yang tidak berbuah.
- Sama ada sakit jika dicantas.
- Buah apa yang Allah mahu kita hasilkan.
- Apa ertinya tinggal tetap di dalam Yesus.
- Mengapa Yesus memberitahu perumpamaan ini.



#25 BERDOA ATAU TIDUR

TONTON VIDEO <https://tinyurl.com/BerdoaTidurTTF>

DENGARKAN PEMBACAAN <https://tinyurl.com/BerdoaTidurAud>

Baca Matius 26:36-46 Alkitab Versi Borneo – AVB

³⁶Selepas itu, Yesus pergi bersama mereka ke sebuah tempat bernama Getsemani, lalu Dia berkata kepada murid-murid-Nya, “Duduklah di sini sementara Aku berdoa di sana.”³⁷Yesus membawa bersama-Nya Petrus dan kedua-dua anak Zebedeus. Dia mula berasa dukacita dan resah.

³⁸Dia berkata kepada mereka, “Jiwa-Ku sungguh dukacita, bagaikan mati. Duduklah di sini berjaga bersama-Ku.”

³⁹Yesus pergi jauh sedikit dari situ lalu sujud menyembamkan muka ke tanah dan berdoa, “Ya Bapa-Ku, kalaulah dapat, edarkanlah cawan ini daripada-Ku; namun, bukanlah seperti yang Kukehendaki, melainkan seperti yang Kaukehendaki.”

⁴⁰Kemudian Dia kembali kepada murid-murid-Nya dan mendapati mereka tertidur; lalu Dia berkata kepada Petrus, “Satu jam pun kamu tidak dapat berjaga bersama-Ku? ⁴¹Berjaga dan berdoalah, takut nanti kamu tergoda. Memang rohani rela, tetapi jasmani lemah.” ⁴²Bagi kali kedua, Dia pergi dan berdoa, “Ya Bapa-Ku, jika cawan ini tidak mungkin beredar daripada-Ku melainkan Kuminum, terlaksanalah kehendak-Mu.” ⁴³Selepas itu, Dia mendapati mereka tidur lagi, kerana mata mereka sungguh mengantuk.

⁴⁴Dia pun meninggalkan mereka dan pergi berdoa lagi, bagi kali ketiga. Dia mengucapkan kata-kata yang sama.

⁴⁵Setelah itu, Dia mendapatkan murid-murid-Nya lalu berkata, “Adakah kamu masih tidur dan berehat? Lihatlah, masanya telah menjelang, dan Anak Manusia sedang dikhianati untuk diserahkan ke tangan orang berdosa.

⁴⁶Bangunlah, mari kita pergi. Lihat, pengkhianat-Ku sudah tiba.”



SAYA TERTANYA-TANYA

- Mengapa Yesus berdoa.
- Sama ada mudah untuk mendoakan apa yang Yesus doakan.
- Bagaimana perasaan Yesus apabila Dia mendapati murid- murid-Nya itu tertidur.
- Apa maksud Yesus apabila Dia berkata, “Memang rohani rela, tetapi jasmani lemah”.
- Mengapa Yesus mendoakan doa yang sama sebanyak 3 kali.



#26 PENGKHIANATAN

TONTON VIDEO <https://tinyurl.com/PengkhianatanTTF>


DENGARKAN PEMBACAAN <https://tinyurl.com/PengkhianatanAud>

Baca Matius 26:47-56 Alkitab Versi Borneo – AVB

⁴⁷Ketika Dia sedang berkata-kata itu, seorang daripada murid-Nya yang dua belas, Yudas, datang diiringi orang yang sangat ramai dan bersenjatakan pedang serta belantan. Mereka datang daripada ketua-ketua imam dan tua-tua. ⁴⁸Pengkhianat Yesus telah menetapkan satu isyarat dengan mereka, “Yang kucium nanti, itulah Dia; tangkaplah Dia.” ⁴⁹Dengan segera dia menghampiri Yesus sambil berkata, “Selamat sejahtera, Rabbi!” lalu mencium-Nya. ⁵⁰Yesus berkata kepadanya, “Kawan, mengapakah kamu datang?” Orang ramai itu pun menangkap Yesus.

⁵¹Tiba-tiba seorang murid Yesus menghunus pedangnya lalu menetak hamba imam besar, sehingga terputus telinganya. ⁵²Tetapi Yesus berkata kepada murid-Nya itu, “Simpan semula pedangmu di tempatnya yang wajar, kerana semua yang menggunakan pedang akan musnah dimakan pedang. ⁵³Adakah kamu sangka Aku tidak boleh berdoa supaya Bapa-Ku menghantar lebih daripada dua belas pasukan tentera malaikat untuk menolong-Ku?


⁵⁴Bukankah kejadian ini mesti berlaku supaya yang tersurat dalam Kitab Suci ternyata benar?” ⁵⁵Kemudian Yesus berkata kepada orang ramai itu, “Patutkah kamu datang, bagaikan hendak menangkap perompak, dengan pedang dan belantan, untuk membawa-Ku



pergi? Hari demi hari Aku duduk bersamamu, mengajar di Bait Suci, dan kamu tidak menangkap-Ku.

⁵⁶Tetapi segala ini berlaku supaya yang tersurat dalam kitab nabi-nabi terlaksana.” Setelah itu, semua murid Yesus meninggalkan-Nya, masing-masing melarikan diri.

SAYA TERTANYA-TANYA

- Bagaimana perasaan Yudas ketika dia datang kepada Yesus bersama-sama dengan ketua-ketua imam dan orang ramai.
 - Bagaimana perasaan Yesus ketika Yudas mengkhianati-Nya dengan ciuman.
 - Bagaimana perasaan Yesus ketika mereka menangkap-Nya.
 - Mengapa salah seorang murid Yesus menghunuskan pedangnya lalu menetak putus telinga hamba imam besar.
 - Mengapa Yesus menegur murid-Nya itu.
 - Mengapa murid-murid Yesus melarikan diri.
 - Bagaimana perasaan Yesus ketika semua murid-Nya melarikan diri.
- 

#27 PENYALIBAN

TONTON VIDEO <https://tinyurl.com/PenyalibanTTF>

DENGARKAN PEMBACAAN <https://tinyurl.com/PenyalibanAud>

Baca Lukas 23:26-43 Alkitab Versi Borneo - AVB

²⁶Ketika askar-askar membawa Yesus ke tempat orang disalib, mereka berjumpa dengan seorang lelaki yang bernama Simon. Dia berasal dari Kirene dan sedang dalam perjalanan ke kota. Askar-askar menangkapnya, memaksanya memikul salib Yesus dan berjalan di belakang-Nya.

²⁷Ramai orang mengikut Yesus; antara mereka beberapa orang perempuan yang menangi dan meratapi-Nya. ²⁸Yesus berpaling kepada mereka lalu berkata, "Kaum perempuan Yerusalem, janganlah tangisi Aku melainkan tangisilah dirimu dan anak-anakmu sendiri.

²⁹Masanya akan datang kelak apabila orang akan berkata, 'Diberkatilah perempuan yang tidak pernah mengandung, melahirkan dan menyusui anak!'

³⁰Pada masa itulah mereka akan berkata kepada gunung-gunung, 'Timpalah kami!' dan kepada bukit-bukit, 'Timbuslah kami!'

³¹Jika perbuatan begini dilakukan mereka terhadap pokok kayu yang masih hijau, apatah lagi terhadap pokok yang kering?" ³²Ada dua orang lain, iaitu kedua-duanya penjahat, yang akan dibunuh bersama Yesus. ³³Setelah mereka sampai ke tempat yang bernama, "Tengkorak," mereka pun menyalib Yesus dan kedua-dua orang penjahat itu, seorang di sebelah kanan dan seorang di sebelah kiri-Nya. ³⁴Yesus berkata, "Ya Bapa, ampunilah mereka kerana mereka tidak tahu apa yang dilakukan mereka." Mereka membahagi-bahagikan pakaian-Nya dengan membuang undi.

³⁵Orang ramai yang berdiri di situ memandang sahaja sementara para



pemimpin masyarakat mengejek-Nya, "Orang lain diselamatkan-Nya; biarlah Dia menyelamatkan diri-Nya sekarang jika Dia sesungguhnya Kristus yang dipilih oleh Allah."

³⁶Askar-askar juga memperolok-olokkan Yesus. Mereka menghampiri-Nya dan membawa air anggur masam kepada-Nya

³⁷lalu berkata, "Jika Engkau Raja orang Yahudi, selamatkanlah diri-Mu."

³⁸Pada sebelah atas kayu salib Yesus tertulis kata-kata: "Inilah Raja orang Yahudi."

³⁹Seorang daripada penjahat yang disalib di situ mula mencela-Nya. Dia berkata, "Bukankah Engkau Kristus? Selamatkanlah diri-Mu dan kami!"

⁴⁰Tetapi seorang penjahat lagi menegurnya, "Tidakkah kamu takut akan Allah? Kita sama-sama dihukum mati.

⁴¹Bagi kita, hukuman ini adil kerana kita menerima balasan yang setimpal; tetapi orang ini tidak melakukan kesalahan apa-apa."

⁴²Dia berkata kepada Yesus, "Ya Yesus, ingatilah aku ketika Engkau menaiki takhta kerajaan-Mu." ⁴³Yesus menjawab, "Sesungguhnya Aku berkata kepadamu, pada hari ini juga engkau akan bersama-Ku dalam Firdaus."

SAYA TERTANYA-TANYA

- Mengapa Yesus tidak menyelamatkan diri-Nya sendiri.
- Mengapa salah seorang penjahat yang disalib bersama Yesus, menegur penjahat yang menghina Yesus itu.
- Mengapa ada tertulis di sebelah atas salib Yesus yang berbunyi "INILAH RAJA ORANG YAHUDI."
- Mengapa askar-askar menyalibkan Yesus.
- Mengapa askar-askar membuang undi untuk pakaian Yesus.
- Mengapa Yesus meminta Bapa-Nya mengampuni mereka yang menyalibkan Dia.
- Bagaimana perasaan orang ramai melihat Yesus disalibkan.
- Bagaimana rasanya berada bersama Yesus di Firdaus.

#28 MAKAM YANG KOSONG

TONTON VIDEO <https://tinyurl.com/MakamKosongTTF>


DENGARKAN PEMBACAAN <https://tinyurl.com/MakamKosongAud>

Baca Yohanes 20:1-8 Alkitab Versi Borneo – AVB

¹Pada awal pagi hari pertama minggu itu, ketika masih gelap lagi, Maria Magdalena pergi ke makam itu. Dia mendapati batu penutup telah digulingkan dari lubang makam itu. ²Dia pun berlari mencari Simon Petrus dan murid lain yang dikasihi oleh Yesus lalu berkata, “Jenazah Tuhan telah diambil dari makam, entah ke mana dialihkan.”

³Petrus dan murid lain itu pun pergi ke makam. ⁴Kedua-duanya berlari, tetapi murid lain itu berlari mendahului Petrus dan tiba di makam itu lebih dahulu. ⁵Dia menjenguk ke dalam dan melihat kain linen di situ tetapi tidak masuk ke makam itu.

⁶Apabila Simon Petrus yang menyusul murid lain itu tiba, dia terus masuk ke dalam makam itu dan nampak kain linen terletak di situ. ⁷Dia juga melihat kain kafan linen yang diikatkan pada kepala Yesus, terlipat berasingan. ⁸Kemudian, murid lain yang sampai dahulu di kubur itu pun masuk. Dia melihat segala-galanya lalu percaya.



SAYA TERTANYA-TANYA

- Jika saya akan pergi ke makam seorang diri ketika masih gelap.
- Siapa yang menggulingkan batu itu.
- Bagaimana perasaan Maria sewaktu dia menyangka mayat Yesus dikeluarkan dari kubur.
- Mengapa Petrus sampai lebih lambat daripada murid yang lain.
- Mengapa murid yang lain itu tidak masuk dahulu.
- Apa artinya kain kafan linen yang diikatkan pada kepala Yesus, terlipat berasingan dengan kain linen yang satu lagi.
- Apa yang berlaku pada tubuh Yesus.



#29 DIA BANGKIT

TONTON VIDEO <https://tinyurl.com/DiaBangkitTTF>

DENGARKAN PEMBACAAN <https://tinyurl.com/DiaBangkitAud>

Baca Markus 16:1-13 Alkitab Versi Borneo – AVB

¹Setelah tamat hari Sabat, Maria Magdalena, Maria ibu Yakobus, dan Salome membeli ramuan rempah untuk melumuri jenazah Yesus. ²Pada awal pagi hari pertama minggu itu, mereka sampai di makam itu ketika matahari terbit.


³Mereka berkata-kata sesama sendiri, “Siapa yang akan menggulingkan batu daripada pintu makam untuk kita?” ⁴Apabila mereka memandangi makam itu, mereka mendapati batu yang sangat besar itu telah pun digulingkan.

⁵Mereka masuk ke dalam makam itu dan melihat seorang pemuda berjubah putih sedang duduk di sebelah kanan; mereka sungguh terkejut dan ketakutan. ⁶Tetapi dia berkata kepada mereka, “Jangan takut. Kamu mencari Yesus orang Nazaret, yang telah disalib. Dia telah bangkit semula! Dia tidak ada di sini. Lihatlah tempat mereka baringkan jenazah-Nya.

⁷Tetapi, pergilah, beritahu murid-murid-Nya, termasuk Petrus, bahawa Dia mendahului kamu ke Galilea. Di sana kamu akan melihat-Nya, seperti yang telah dikatakan-Nya kepada kamu.” ⁸Mereka pun segera keluar dan berlari meninggalkan makam itu, kerana mereka gementar dan kehairanan. Mereka tidak berkata apa-apa kepada sesiapa, kerana mereka takut.

⁹Setelah Yesus bangkit semula pada awal pagi hari pertama minggu itu, pertama sekali Dia menampakkan diri-Nya kepada Maria Magdalena yang telah disembuhkan-Nya daripada dirasuk tujuh roh iblis dahulu.

¹⁰Maria pun pergi memberitahu murid-murid-Nya yang sedang berkabung dan menangis.



¹¹Ketika mendengar bahawa Yesus hidup dan telah dilihat oleh Maria, mereka tidak percaya.

¹²Selepas itu, Dia menampakkan diri dengan cara lain kepada dua orang daripada mereka ketika mereka sedang berjalan ke desa. ¹³Kedua-dua orang murid Yesus itu segera pergi memberitahu yang lain, tetapi mereka juga tidak percaya.

SAYA TERTANYA-TANYA

- Mengapa dan berapa banyak ramuan rempah yang dibawa oleh wanita-wanita itu untuk melumuri jenazah Yesus.
- Apa kerisauan utama mereka dan mengapa.
- Siapa yang membantu mereka menggulingkan batu itu.
- Mengapa wanita-wanita itu berasa terkejut apabila melihat seorang pemuda berjubah putih sedang duduk di sebelah kanan di dalam makam itu.
- Apa yang terlintas dalam fikiran mereka apabila mereka mendengar bahawa Yesus telah bangkit.
- Mengapa mereka ketakutan dan kehairanan.
- Mengapa murid-murid lain tidak percaya kepada Maria dan wanita yang lain.

SOALAN APLIKASI TAMBAHAN

- Yesus Hidup. Kongsikan apakah ertinya bagi anda hari ini.



#30 YESUS DAN TOMAS

TONTON VIDEO <https://tinyurl.com/YesusDnTomasTTF>


DENGARKAN PEMBACAAN <https://tinyurl.com/YesusDnTomasAud>

Baca Yohanes 20:24-29 Alkitab Versi Borneo – AVB

²⁴Tomas yang digelar Didimus, seorang daripada murid Yesus yang dua belas itu, tidak ada bersama mereka apabila Yesus datang. ²⁵Oleh itu, murid-murid lain memberitahu Tomas, “Kami telah melihat Tuhan!” Tetapi Tomas berkata, “Selagi aku tidak melihat sendiri bekas paku di tangan-Nya, dan memasukkan jariku ke dalam bekas luka itu, juga memasukkan tanganku ke dalam rusuk-Nya, aku tidak mahu percaya.”

²⁶Seminggu selepas itu, para murid Yesus termasuk Tomas berhimpun lagi di situ. Sungguhpun pintu terkunci seperti dahulu, Yesus muncul dalam kalangan mereka lalu berkata, “Damai sejahtera kepada kamu!” ²⁷Setelah itu, Dia berkata kepada Tomas, “Hulurkan jarimu di sini, dan lihatlah tangan-Ku. Hulurkan tanganmu dan masukkannya ke dalam rusuk-Ku. Jangan ragu-ragu lagi. Percayalah.”

²⁸Tomas pun berkata kepada Yesus, “Ya Tuhanku! Ya Allahku!” ²⁹Yesus berkata kepadanya, “Tomas, oleh sebab kamu telah melihat-Ku maka kamu percaya. Diberkatilah orang yang percaya walaupun tidak melihat-Ku!”



SAYA TERTANYA-TANYA

- Mengapa Tomas tidak bersama murid-murid yang lain ketika pertama kali Yesus datang kepada mereka.
- Mengapa Tomas tidak percaya bahawa rakan-rakannya telah melihat Yesus.
- Bagaimana Yesus muncul secara tiba-tiba walaupun pintu terkunci.
- Bagaimana rasanya memasukkan jari ke dalam luka di rusuk Yesus.
- Bagaimana nada dan suara Yesus ketika Dia bercakap dengan Tomas.
- Mengapa Tomas memanggil Yesus, Tuhan dan Allah.
- Bagaimana saya boleh percaya terhadap sesuatu tanpa melihat.

